

Den compania di patrocinador Gobernador Refunjol

FUNDACION MUSEO ARUBANO TA RENOVA HOLOSHI WILLEM III TOREN DEN SU GLORIA DI ANTES



STA. CRUZ -- Oranjestad ta merece un holoshi cu ta funciona bon, principalmente si e ta situa den toren di monumento mas bieu di Aruba'. Asina Gobernador di Aruba y alavez patrocinador di Fundacion Museo Arubano, su Excelencia sr. Fredis Refunjol a bisa durante re-inauguracion di e holoshi di Willem III Toren. Recientemente dos experto di Hulanda a drecha e holoshi extraordinario cu tabata defecto pa añanan largo. Presidente di directiva di Fundacion Museo Arubano, sra. Alice van Romondt a expresa su gratitud na Kabinet di Gobernador di Aruba, Aruba Bank y Meta Corporation kendenan a financia e proyecto hunto cu Prins Bernhard Cultuurfonds NA/ A. Alavez el'a gradici sponsor permanente Gandelman Jewelers, cu ta pone su experto di holoshi Gerlad Werleman disponibel pa mantencion preventivo di e holoshi. Como parti di Fort Zoutman, Willem III Toren ta e monumento mas bieu di Aruba y ta tipico pa arquitectura Hulandes historico na Aruba. Na un manera espectacular a desvela e holoshi, ora mariniernan di Marinierskazerne Savaneta sin mucho esfuerso a baha for di top di e toren. Durante e ceremonia claramente a bini dilanti con extraordinario e holoshi di Willem III Toren ta. No solamente den region, pero tambe na Hulanda, caminda ainda tin solamente algun ehemplar. Pa medio di

Prins Bernhard Cultuurfonds, directiva di Fundacion Museo Arubano a bini den contacto cu expertonan di holoshi Melgert Spaander y André Bossenbroek. Durante e trabaonan di reparacion nan a haya asistencia di sr. Gerald Werleman di Gandelman Jewelers. Sr. Werleman lo keda den contacto cu e dos expertonan, pa tambe despues di e trabaonan haci trabao di mantencion preventivo. Mester bisa cu e proyecto a exigí trabao di hopi precision y a costa 50 mil florin. Fundacion Museo Arubano ta hopi contento cu e hecho cu Gobernador Refunjol ta patrocinador di e fundacion aki. Esaki ta un di e maneranan pa tene e lazo historico entre Hulanda y Aruba y tambe e posicion di Aruba den Reino bibo den e tempo moderno aki. A construi Fort Zoutman na año 1796. Añanan despues, na 1868, a añadi Willem de III Toren hunto cu prome holoshi publico. E toren a fungi como vuurtoren completamente cu campana y lampi di petroleo. For di 1816 e Forti pa mas di un siglo a funciona como alohamento pa oficinanan di Gobierno y despues como Warda di Polis y prison. Awendia Fort Zoutman ta ubica Museo Historico Arubano cu ta bay bek den tempo di comienzo di periodo historico cu yegada di e Spañonan na Aruba y despues yegada di Lago Oil Refinery cual ta tipifica e epoca industrial di Aruba te cu Status Aparte!